

## NUS lancar inisiatif masyarakat baru

UNIVERSITI Nasional Singapura (NUS) telah melancarkan satu inisiatif masyarakat baru semalam sempena sambutan ulang tahunnya yang ke-110.

Kakitangan fakulti dan penyelidikan serta mahasiswa universiti itu akan bekerjasama dengan rakan kongsi NUS bagi mengenal pasti masalah masyarakat yang rumit dan memanfaatkan kepakaran penyelidikan serta akademik universiti itu dalam mencari huraian kreatif lagi praktikal.

Dipanggil NUS Cares (Kemajuan Masyarakat menerusi Sinergi Penyelidikan dan Pendidikan), inisiatif itu bertujuan menjadi satu wadah penyelesaian, kata Presiden NUS, Profesor Tan Chorh Chuan.

“Kami akan merintis huraian praktikal dan jika berjaya akan berkongsi perkara penting yang dipelajari bagi membolehkan amalan berkesan dilaksanakan,” ujarnya.

Sebagai contoh, NUS kini bekerjasama dengan Majlis Pembangunan Masyarakat (CDC) Central Singapore bagi membantu menangani masalah yang dihadapi warga emas dan penduduk berpendapatan rendah yang perlu menggunakan kerusi roda.

Sedang mereka tidak kuat menggunakan kerusi roda biasa, kerusi roda mekanikal pula terlalu mahal.

Justeru, mahasiswa kejuruteraan NUS akan cuba menghasilkan kerusi roda yang dimampui, tahan lama dan mudah digunakan.

Rekaan mereka itu akan digunakan penduduk Kampong Glam dan jika berjaya akan diluaskan kepada lain kawasan di Central Singapore.

Selain CDC Central Singapore, sebagai permulaan, NUS juga bekerjasama dengan Sistem Kesihatan Universiti Nasional dan Peratuan Perubatan NUS.

Inisiatif NUS Cares itu dilancar di satu acara masyarakat di Kelab Masyarakat Taman Jurong.

Turut diadakan di acara tersebut ialah ceramah dan permainan berkaitan kesihatan.

Lebih 1,000 orang hadir di acara tersebut, termasuk Timbalan Perdana Menteri, Encik Tharman Shanmugaratnam, yang hadir sebagai tetamu terhormat.